

Zakoni o reformi policije moraju biti usvojeni kako bi se osiguralo potpisivanje Sporazuma o stabilizaciji i pridruživanju



Nakon sjednice Glavnog odbora SDA koja je održana u subotu, pojavile su se određene tvrdnje prema kojima bi Sporazum o stabilizaciji i pridruživanju mogao biti potpisan bez usvajanja zakona o reformi policije.

Reagirajući na ove tvrdnje, visoki predstavnik i specijalni predstavnik EU Miroslav Lajčák istaknuo je kako EU očekuje da se u državnom parlamentu usvoje zakoni o reformi policije kako bi se potpisao Sporazum o stabilizaciji i pridruživanju. Ovaj uvjet je već više puta ponovljen, i tokom proteklih dana.

Lajčák je naglasio kako je šira međunarodna zajednica podržala pristup Evropske unije, pozivajući na hitno usvajanje zakona o reformi policije u skladu sa Mostarskom deklaracijom i kasnijeg Akcionog plana.

Svako ko tvrdi da Sporazum o stabilizaciji i pridruživanju može biti potpisan u skoroj budućnosti, a da se pri tome može odgoditi usvajanje zakona o reformi policije, naprosto zavarava javnost.

“Integracija u EU je najvažniji strateški cilj BiH. Obični ljudi žele da vide razvoj, jače socijalne i poslovne veze sa EU, žele liberalizaciju viznog režima,” izjavio je visoki

predstavnik i specijalni predstavnik EU.

Visoki predstavnik i specijalni predstavnik EU također je podsjetio sve koji dovode u pitanje postojanje entiteta da je Vijeće za implementaciju mira potvrdilo da Ustav Bosne i Hercegovine priznaje da je Bosna i Hercegovina sačinjena od dva entiteta i da su Bošnjaci, Hrvati i Srbi konstitutivni narodi. Međunarodna zajednica ostaje opredijeljena principima na kojima počiva Opći okvirni sporazum za mir.